



7 Disember 2016
7 December 2016
P.U. (A) 306

WARTA KERAJAAN PERSEKUTUAN

FEDERAL GOVERNMENT GAZETTE

KAEDAH-KAEDAH CUKAI PENDAPATAN (POTONGAN BAGI PELABURAN DALAM SYARIKAT BERSTATUS BIONEXUS) 2016

INCOME TAX (DEDUCTION FOR INVESTMENT IN A BIONEXUS STATUS COMPANY) RULES 2016



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI PENDAPATAN 1967

KAEDAH-KAEDAH CUKAI PENDAPATAN (POTONGAN BAGI PELABURAN DALAM SYARIKAT BERSTATUS BIONEXUS) 2016

PADA menjalankan kuasa yang diberikan oleh perenggan 154(1)(b) Akta Cukai Pendapatan 1967 [*Akta 53*], Menteri membuat kaedah-kaedah yang berikut:

Nama dan permulaan kuat kuasa

1. (1) Kaedah-kaedah ini bolehlah dinamakan **Kaedah-Kaedah Cukai Pendapatan (Potongan bagi Pelaburan dalam Syarikat Berstatus BioNexus) 2016**.

(2) Kaedah-Kaedah ini hendaklah berkuat kuasa mulai tahun taksiran 2016.

Tafsiran

2. Dalam Kaedah-Kaedah ini—

“Malaysian Bioeconomy Development Corporation Sdn. Bhd.” ertinya suatu syarikat yang diperbadankan di bawah Akta Syarikat 1965 [*Akta 125*] yang fungsinya adalah bagi maksud membangunkan industri bioteknologi di Malaysia;

“orang yang layak” ertinya—

(a) suatu syarikat yang diperbadankan di bawah Akta Syarikat 1965; atau

(b) seorang individu warganegara Malaysia, bermastautin dan mempunyai punca pendapatan perniagaan;

“pelaburan” ertinya—

(a) pelaburan dalam bentuk tunai yang tidak terdapat tanggungan untuk pelaburan itu dibayar balik; atau

(b) pelaburan dalam bentuk pegangan modal berbayar;

“pelaburan dalam bentuk pegangan modal berbayar” ertinya pelaburan dalam bentuk pegangan modal berbayar yang dibayar dalam bentuk tunai berkenaan dengan syer biasa;

“perniagaan baharu” ertinya perniagaan bioteknologi pertama yang dijalankan oleh suatu syarikat berstatus BioNexus;

“syarikat berstatus BioNexus” ertinya suatu syarikat yang diperbadankan di bawah Akta Syarikat 1965 yang terlibat dalam perniagaan sains kehidupan seperti biologi, perubatan, antropologi, ekologi atau apa-apa cabang sains lain, yang berurusan dengan organisma hidup dan organisasinya, proses kehidupannya dan hubungan antara satu dengan lain, dan alam sekitarnya.

Potongan

3. (1) Bagi maksud menentukan pendapatan larasan bagi orang yang layak daripada perniagaannya, maka hendaklah dibenarkan suatu potongan dalam tempoh asas bagi suatu tahun taksiran suatu amaun yang bersamaan dengan nilai sebenar pelaburan yang dibuat oleh orang yang layak itu dalam tempoh asas itu dalam suatu syarikat yang diluluskan oleh Menteri sebagai suatu syarikat berstatus BioNexus.

(2) Pelaburan yang disebut dalam subkaedah (1) hendaklah dibuat—

- (a) bagi suatu tempoh yang tidak lebih awal daripada 1 Januari 2016 dan tidak lewat daripada 31 Disember 2020;
- (b) mengikut amaun yang diluluskan oleh Menteri; dan
- (c) bagi maksud semata-mata untuk membiayai aktiviti pada peringkat permulaan pengkomersialan suatu perniagaan baharu yang diluluskan oleh Menteri.

(3) Pelaburan yang dibuat oleh orang yang layak sebelum permulaan suatu perniagaan baharu hendaklah disifatkan telah dibuat pada tarikh bermulanya perniagaan baharu itu sebagaimana yang ditentukan oleh Malaysian Bioeconomy Development Corporation Sdn. Bhd.

(4) Jika pelaburan adalah pelaburan dalam bentuk pegangan modal berbayar, syer biasa tidak boleh dilupuskan dalam tempoh lima tahun dari tarikh terakhir pelaburan itu dibuat.

(5) Jika orang yang layak yang telah membuat pelaburan dalam bentuk pegangan modal berbayar dan menuntut suatu potongan berkenaan dengan pelaburan itu di bawah subkaedah (1) melupuskan syer biasa dalam tempoh lima tahun dari tarikh terakhir pelaburan itu dibuat dan menerima suatu amaun sebagai balasan bagi pelupusan syer biasa itu, amaun yang diterima oleh orang yang layak itu hendaklah ditambah dalam menentukan pendapatan larasannya bagi tahun taksiran dalam tempoh asas yang amaun itu diterima.

(6) Amaun yang diterima yang ditambah dalam menentukan pendapatan larasan orang yang layak itu di bawah subkaedah (5) tidak boleh melebihi jumlah keseluruhan potongan yang telah dibenarkan berhubung dengan pelaburan dalam bentuk pegangan modal berbayar itu.

(7) Bagi maksud kaedah ini, “peringkat permulaan pengkomersialan” ertinya peringkat kajian, penilaian dan pembangunan bagi konsep permulaan atau prototaip sebelum teknologi atau produk dikomersialkan, tetapi tidak termasuk peningkatan kapasiti produk, pembangunan produk atau pemasaran produk.

Syarat kelayakan bagi potongan

4. (1) Potongan yang dibenarkan di bawah Kaedah-Kaedah ini adalah tertakluk kepada syarat yang berikut:

- (a) orang yang layak telah mengemukakan permohonan kepada Menteri melalui Malaysian Bioeconomy Development Corporation Sdn. Bhd.

bagi kelulusan untuk membuat pelaburan dalam suatu syarikat berstatus BioNexus pada atau selepas 1 Januari 2016 dan permohonan itu telah diluluskan oleh Menteri;

(b) jika orang yang layak merupakan suatu syarikat, tiada syarikat lain yang merupakan syarikat berkaitan kepada syarikat itu yang telah dibenarkan potongan di bawah Kaedah-Kaedah ini atau Kaedah-Kaedah Cukai Pendapatan (Potongan bagi Pelaburan dalam Syarikat Berstatus BioNexus) 2007 [*P.U. (A) 373/2007*];

(c) jika orang yang layak itu merupakan seorang individu—

(i) hanya tiga permohonan boleh dibenarkan bagi tujuan kelulusan potongan di bawah Kaedah-Kaedah ini;

(ii) setiap kelulusan hendaklah diberikan berkenaan dengan pelaburan yang dibuat dalam tiga aktiviti yang berbeza bagi perniagaan baharu iaitu pertanian, penjagaan kesihatan atau perindustrian; dan

(iii) pelaburan hendaklah dibuat dalam syarikat berstatus BioNexus yang apa-apa modal berbayarnya tidak dimiliki oleh—

(A) suami atau isteri kepada individu itu;

(B) abang atau adik lelaki atau kakak atau adik perempuan, kepada individu itu atau kepada suami atau isteri individu itu;

(C) ibu atau bapa, kepada individu itu atau kepada suami atau isteri individu itu;